

CADASIA YACNOCQUIDON ISTE

Pabadon tauamboen chiaid

¹ Pabado nebi. Esus chuibenequidquo nebi. Matsesën: —Adquid icta —¿caidtabi nedi? Padenquo. Esuquidistun: —Ëbi chuibeneta —caidquo nebi. Aid uincuemenëdaid Nuquin Papantsen: —Con mado Esus chuibeneta —caidquo nebi. ² Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësquo iquec. Adembidi tantiec nëmbo icquido Esus tantiaquidtedi: —Unësquo iquec —quiosh. ³ Mibi tantiaquin Nuquin Papa chianembi naden. —Min Mado Esuquidistubëdtan bëdamboen isquin Cadasia yacnocquido bëdambo icmeta, Papa —quequin Nuquin Papa chianembi. ⁴ Matses bëdambo icmequid Esus nec. —Ëbi tantiesabo tabadachimboec icsamboec tabadboedëmbi ëbi tantiasho bëdamboec tabadquid icmendambi —quiash Nuquin Papan chiacpadec abi tantiaquido cuidmenquo icnuec abided cuidadec Esus unëspac caondash. ⁵ Aidën Papa tantiaquin: —Nuquin Papa bëdamboshë iquec —canuna ënenquo icquin.

Esusuidi tantienquo yanaid

⁶ —Esus tantienquo yanosh —quequin mimbi naid chuisho tantias shubitiadquo iccobi. ¿Ëbi chonobida badedquo Esus

tantienquo yano? Nuquin Papan tantiamiac abided ciudadec unësaid Esus tantiec mibi tabadondac. Aden Nuquin Papa aton Mado Esusbëdta tantiaboedëmbi ¿nëbida Nuquin Papa tantienquo yano? Utsibon icsamboen chiaquien mimbi Esus tantienquo yanac. ⁷¿Aidon chiaidta bëdambo icpec? Aidon chiaid ma Nuquin Papan chiaidpenquo neyoc. Esusquo chienquo icquin muaquin chuisho tantiashun: —Abimboen cachitec —queshun mimbi Esus tantienquo yampac. ⁸—Aton Mado Esusuidtsëqui tantiasho Nuquin Papan nuqui bëdamboen isec —quequin abimbo chiondambi. —Nuquin Papan chiaid abimbo chienquo icsho Nuquin Papan cuidpashuni —quequin aden abimbo chiondambi. Nuquin Papan abi yacnoshon uaid mayan bëdantsen muaquin chuisho tantiashun aidtsen: —Nuquin Papan cuidpashun —catsiambi. Utsibontsen muaquin chuisho tantiash aidotsen: —Cuidpashun —quiobi. ⁹ Tantia. Adembidi mibi chuinu. Ëmbi chuibanac mimbi Esus tantiabenondac. Mimbi tantiondaid Esusquo chienquo icsho: —Nuquin Papan cuidpashun —caimbi mibi muauaquin chuiquido. ¹⁰—¿Matsesën: “Mibi bëdambo iquec,” mabi canu —quequindambi aden chuibampadi? Padenquo. Nuquin Papan chiacpadomboen mambi natiadquo yoc. —Bëdambo iquec —Nuquin Papa camenuen mambi chuibampaboc. Matsesën chiacpadomboenuidi natiapimbo iquebi. Adenuidi naic Esuquidistun yuambo ictiapimbo ictsiabi.

Esusën chiaidquo chiec nebi, quiaid

¹¹ Tantia, con utsibo. Mibitedi chuinu. — Esus tantiasho Nuquin Papan matses bēdamboen isbentsiash —quequin ěmbi chuiboed amben chi-aidpenquo nec. ¹² Matsesĕn chiabi Esuquidistun tantiamiac ambi chiaidquo chuibanombi.

¹³ Tantia. Aden Esusĕn ěbi tantiamiondaid mibi chuinu. Con matses isadaidbon chiacpadomboenuidi natiadquo icquin Nuquin Papa tantiesabo danquin Esus tantiaquido comapenen chieshĕnquin cuesun secatiadquo icpadenebi. Ěmbi adodened ěmbi chuisho mimbi tantiondac. ¹⁴ Nuquin Papa tantiatiadquo icquin con matsesĕn chiaid abitedimbo natiadquo ictenebi. Ěbĕdta tishaidon caniabon bĕdiactsĕc natiadquo icnubi con tsusedpabon chiaiduidi natiadquo ictenebi. Adquid icquin Esus tantiaquido comapenen chieshĕndenembi. ¹⁵ Adshobini Nuquin Papan aton Mado Esus tantiamiondash. Ěbi tishabi icnubi ěbi caic: — Con Mado Esus tantiameshun bēdamboen isquin ¹⁶ Pabado: “Matses utsibo isadaidpembo con Mado Esus chuibeneta,” caindambi —quequin ambi chiacpadomboen Esus tantiamiondashi. Adoac: —Ěsusĕn chiaid ěbi chui —quequin matses chiambo iccondambi. ¹⁷ Shubu dadpen icquid Edusaden caid yacnocquido Esusbĕd icnĕdaido ambia Esus chuibanĕdaido chuitanambo iccondambi. Utsibo chienquo yec nidaid utsi Adabia caid yacno matses nibĕdacno badedquo nidtanondabi. Adashic yuec-yuecpambo ictanec auĕshquo choec shubu dadpen icquid Damasco caid yacnobidi choaondabi.

¹⁸ Adashic ambo nidash seta abentsĕc chotsec-

nuc matametaneC Edusaden yacno Petedo isec nidtanondabi. Adec nidash 15tedec ushec aidbëd tabadondabi. ¹⁹ Ambobi Nuquin Icbo Esusën utsi Acobo caid isondambi. Esusbëd icnëdaid utsi isambo iccondambi. Aid daëdtsëqui isondambi. Utsibo padambo. ²⁰ Abimbo chuiquin nëid dada uaic nebi. Ëmbi aden chuibansho tantiash: –Ai, abimbo caic –quec Nuquin Papa.

²¹ Aden Edusaden yacno istanec choashic yuec-yuecpambo ictanec nidaid utsi Sidia caid yacno nidondabi. Auëshquio nidshun nidaid utsi Sidisia caid yacno istanondambi.

²² Nidaid utsi Udeya caid yacno Esusbëd icnëdaido yacno yuec tabadambo iccondabi. Adsho anocquidon Esus tantiaquidon isabi iccondashi.

²³ Ëmbi naid chuishouidi tantiapac caondash. –Nuquipadquid Esus tantiaquido cuesun secatiadquio icnëdaidëmbi Esus tantiabenshun Esusquio chuibeniosh –quequin ëmbi naid chuishouidi tantiapac caondash. ²⁴ Aden ëmbi naid chuisho tantiash: –Nuquin Papan nac Pabado bëdambo iquec. Adomboen Pabado tantiamec Nuquin Papa bëdamboshë iquec – quepac caondash Udeya yacnocquido.

2

Edusaden yacno nidoaid

¹ Yuecash seta 14ted matamiash Edusaden yacnobidi nidoapondabi. Èbëdi Bednabe caid nidpondash. Titotsen buanondambi.

² Adec Nuquin Papan tantiamiacpadec ambo nidshun Esus tantiaquido chuiquid dapabo caidoudtsëqui cho-chomeshun ëmbi naboed

chui banondambi. –Ĕmbi chiabi yac aidon: “Muequi neque. Pabadon chuisho tantienda,” canushe –qeshun naden chiondambi. –Nuquin matsespenquo isadaidpembo matses utsibo Esusquo chuibeniombi. “Esusuidi tantiasho Nuquin Papan nuqui bēdamboen istsiash,” quequin chuibeniombi. ¿Adembidida mimbi tantiape? –capondambi Esus tantiaquido chuiquid dapabo chuiquin. Ĕmbi adoac: –Ai, adembidi tantiembi –quepondash aidō.

³ Ĕbēd icquid Tito caid isadaidpembo icshobi: –Shui dēbid dēteshune –cainquo iccondash chuiquid dapabon abi utsibon: –Adotiad –canubi. ⁴ Adec: –Shui dēbidien dēteshunetiad –quequido Esus tantiaquid damianquiec Esus tantiaquidombo tabadacno puduedpondash. –Esus tantiaquidon: “Esusuidtsēqui tantiasho Nuquin Papan nuqui bēdamboen isec,” quequin con tsusedpan chiaid niacsho tantianu –quiash ēbi yacno puduedpondash. Adec puduedshun tantiashic: –Mimbi icsamboen chiec. Nuquin tsusedpa Moisesēn chiampidtedi nasho Nuquin Papan bēdamboen istsiash –quepondash. ⁵ Adec aidō: –Nuquin tsusedpan chiampicpadomboenuidien nametiad –quesho: –Padi. Mimbi icsamboen chiec –quequin aidēn chiacpadomboen nainquo iccondambi. –Ma matses utsibon: “Esusēnuidtsēqui Nuquin Papa ēbi bēdamboen ismec,” quequin ma Esusquo tantianu –qeshun nainquo iccondambi.

⁶ Aden Esus tantiaquido chuiquid dapa caidon Esus tantiaquidēn natequid utsi chienquo iccondashi. –Esus tantiabenacsho isun nuquin

tsusedpan chiacpadomboentsen nameta —
 quequin chienquo iccondashi. ¿Esusbêd
 icnêdaidên: —Moisesên chiaidtsen nameta
 —cactambi nametsemponda? Padenquo
 ictsenondambi. ¿Atotsi Nuquin Papan aido
 capec? —Esusbêd iccondaaidquo neque.
 Bêdamboen isnu —¿capenda iquec? Padenquo.
 7 Naden Petedo chedon chiondashi. —Nuquin
 Papan chiacpadomboen mimbi matses utsibo
 isadaidpembo Esusên naid chuibeniac. Nuquin
 Papan chiacpadomboembidi Petedon nuquin
 matses isadaidbo Esusên naid chuibeniosh.
 Petedon nacpadomboen mimbi bêdamboen nac
 —capondashi. 8 —Nuquin Papan namiaid icquin
 Petedon nuquin matses isadaidbo dadpen Êsus
 tantiamiosh. Adembidi Nuquin Papan namiaid
 icquin mimbitsen matses utsibo dadpen Esus
 tantiamiac 9 —queshun bêdamboen ispondashi. —
 Adembidi nanuna. Mimbi isadaidpembo Esusên
 naid chuibenenubi adembidi isadaidbombo
 chuibenendambi —quepondash. Adshumbic: —
 Esus tantiaquidquo mibi nec —queshun chuiquid
 dapabon Bednabebêdta mêdimbampondashi. Nêidic
 Petedo. Nêidic Acobo. Nêidic Uan. Aidedishun
 chuiquid dapabo icquin adondashi. 10 Nadentsen
 chuipondashi. —Aton na nibêdquido bêdamboen
 isnuna —capondashi. Adsho tantiaash: —Ai,
 adonona —quepondabi. Adanec nidpondabi.

Antioquiya yacnoshon Petedo chushcaid

11 Adash yuectaniash ëbi iccondacno shubu
 dadpen icquid Antioquiya caid yacno Petedo
 chopondash. Auëshquo icsashobimbi bêisquiquin
 chushcapondac. 12 Abêdtan Esus tantiaquido

matses utsibon codocaid pec bēdamboec tabadboedi aton pete isuidanec aīdobēd cuēshēdec Petedo icsapondash. Ambo choash Esus tantiaquido con matsesēmpenquio codocaid pec bēdamboec tabadondash. Adnubien Acobon: — Ambo istan —cac con matses Moisesēn chiampid tantiaquido cho-chopondash. Aido cho-chosho isash: —Moisesēn chiampid niacquin matses utsin codocaid pesho chushcanushe —quec dacuēdquin isadaidpembon pete meniaid isuidampondash Petedon. Adec abēdtan Esus tantiaquido matses utsibobēd cuēshēdec icsapondash. ¹³ Adsho isash anocquido isadaidbotsen abēdtan Esus tantiaquido matses utsibobēd tabadenquio yec cuēshēdpondash. Adsho isash ēbēd icquid Bednabetsen adecbidi cuēshēdec icsapondash. ¹⁴ Adec icsaquin Esusēn chiacpadomboen nainquio icshobimbi Petedo chushcapondac Esus tantiaquidtedishun tantianuc. —¿Ada mimbi bēdamboen naoque? Tantia. Chuinu. Isadaidbo tsusedpan chiaīd matses utsibo mimbi namec. Isadaidbo icquimbi matses utsibon codocaid pec aīdbēdi mibi bēdamboec tabadoc. Aidon piaid pec bēdamboec tabadboedi nēbi aīdbēd mibi cuēshēdoc. Adsho isash mimbi nianaīdo: “Petedon matses isadaidbo tabadacbimboec tabadshouīdien Nuquin Papan nuqui bēdamboen ischitotsiash,” quepec icsamboen chiec. Aden mimbi icsamboen tantiamēque. Tantia. ¿Atotsiequin mimbi naoque? —capondambi Petedo chushcain.

Nuquin Papan bēdamboen iste chiaīd

¹⁵ Naden con matses Petedo chiondambi. — “Moisesēn chiampicpadomboen naisabo matses

utsibo icsambo iquec,” quequin nuquin matses isadaidbon tantiec. Nuquien isadaidbon chidon tishacsho tsusion shui dēbid dēteshun secanēdaido nec. ¹⁶ Adquid icquin: “Moisesēn chiaiduidi naquin Nuquin Papa bēdamboen ismembi,” quedenedi nēbi nuqui utsien chiec. “ ‘Abided cuidadaid Esusēnuidtsēqui Nuquin Papa ēbi bēdamboen ismec,’ quequin Esus tantiasho Nuquin Papan nuqui bēdamboen isec,” quequin nuqui tantiec. Adshun matses utsibobēdtambi nuqui Esus tantiaquiec. “Moisesēn chiaid niaquesa nibēdsho isun Nuquin Papan matses abitedi bēdamboen istiapimbo iquec,” quequin tantiashun nuqui bēdamboen ismequid Esus nuqui tantiabenondac –quequin Petedo chiondami.

¹⁷ Adashic Petedobidi chui-oaic: –“Esusuidi tantiasho Nuquin Papan nuqui bēdamboen istsiash,” queshun Esus tantiabenondacsho nuquin matsesēn icsambo capondashi. “Nuquin tsusedpan chiacpadomboen nainquo yec mibi icsambo iquec matses utsibobimboec,” capondashi nuquin matsesēn. ¿Ada Esuquidistun matses icsambo icmepec? ¿Ambi chiacpadomboen naicta nuqui icsape? Padenquo. ¹⁸ “Nuquin tsusedpan chiampicpadomboen nashoen Nuquin Papan nuqui bēdamboen isec,” quequin nuquin matsesēn chiaid nec. Esus tantiaquin aden chuitiapimbo yanondabi. Adec Esus tantiaquid icboedi: “Padpiden con tsusedpabon chiaiduidi naquin Nuquin Papa bēdamboen ismembi,” queshun abi bēdamboen ismequidquo Esus tantienquo yequini icsambo icchitotsiac. ¹⁹ Con tsusedpa Moisesēn chiacctedi natiadquo

ictenebi. Adquid bēdamboen iste danquin abitedi natiadquio icquimbi abitedi nainquio iccondambi. Adshun: “Moisesēn chiactedi ambembi matsesēn natiapimbo iquec,” qeshun ěmbimbo naid ěnondambi. Nĕbini Esus tantiec Nuquin Papan chiacpadec tabadec. ²⁰ “Ambi con tsusedpa Moises chuimiactedi nashouidi Nuquin Papan nuqui bēdamboen istsiash,” quedenedi Esus tantiec adenquio yanondabi. Nĕbi ěmbi tantiaidquio nainquio yec Esuquidistubĕdi cuĕshĕdenquio yec bēdamboec tabadebi. “Ĕbi tantiec ěbi cuidmenquio icnuec abided cuidadec unĕsac caondash,” quequin tantiaشوeni Esusĕmbi bēdamboec tabadquid icmec. ²¹ “Abided cuidadaid con Mado Esusuidi tantiaشو matses bēdamboen isendambi,” quequin Nuquin Papan chuipanĕdash. Aden Nuquin Papan chiaid niactiapimbo iquebi. Moisesēn dada uapampid ambi chiaid niaquesa icsho Nuquin Papan bēdamboen istsenac. Ambi chiaid niaquesa nibĕdec. Adquid Nuquin Papan chiaid niaquesa icnuc: “Matses cuidmenquio icnuec ěbided cuidadec unĕsnu,” queboedi Esus padenquio ictsempanĕdash —capondambi Petedo chuiquin.

3

Nuquin Papan aton Mayan tabadmiaid

¹ Tantia. —Cadasia yacnocquido piushbimboec-quin tantienquio yanosh —quequin chuisho tantiaشun mibitedi chuinu. ¿Tsuntsin: —Tantienda —cac Esus tantienquio yano? —“Cuesten dectanac abided cuidadaid Esusĕnuidtsĕqui Nuquin Papa

nuqui bēdamboen ismec,” quequin Esus tantiasho Nuquin Papan nuqui cuidenquoio iquec — quequin mibi chuibanondambi. ¿Esus tantiatiapimboda ique? ² Mimbi tantiaid ēbi chui. Tantiānu. ¿Atotsi quiash Nuquin Papan Mayan mibēdi tabadanondash? ¿Nuquin Papan ambi chiaid Moises dada uamepampid mimbi nabanuda mibēd tabadanondash? Padenquoio. Ēmbi chiondaid Esusquoio mimbi tantiabensho isashien mibēd tabadanondash. ³ ¿Pabiate shēcuē choquidida mibi nendac? Tantiā. ¿Atotsieshun tantienquoio ique? Mibēdi tabadquin Nuquin Papan Mayanēn mibi bēdamboec tabadquid icmec. ¿Nēbi Esus tantienquoio yanecta mibi bēdamboec tabadpatisia? Mibembi bēdamboec tabadiapimboen mibi iquec. ⁴ ¿Aden Nuquin Papan aton Mayan mibēdi tabadmiaid icquimbida Esus tantienquoio yano? ⁵ Nuquin Papan aton Mayan mibēdi tabadmequin comapenen tantiaquin nacnenquin mibi ismiondash. ¿Atotsieshun Nuquin Papan aton Mayan mibēdi tabadmec? ¿Con tsusedpa Moisesēn chiampid nashoda Nuquin Papan aton Mayan mibēdi tabadmec? Padenquoio. Ēmbi chiondaidquoio Esusquoio tantiasho Nuquin Papan aton Mayan mibēdi tabadmec.

Nuquin Papa tantiaquidquoio Abadauan chiaid

⁶ ¿Tsutsi Nuquin Papa tantiaquidquoio icpampic? Abadauan nepampic. Nuquin Papan chiac Abadauan: —Abimbo mimbi caic —quesho: —Adquid bēdamboen isembi —queshun Nuquin Papan bēdamboen isbempampic. ⁷ Adec

Abadauan: —Nuquin Papan abimbo caic — quequin tantiapampicpadomboen nēbi matsesēn Esus tantiasho Nuquin Papan bēdamboen isendac ambi Abadauan ispampicpadomboen. ⁸ —Esus tantiaquido iquendac —quequin naden Nuquin Papan Abadauan chuiampic ēndenquimbo. “Abadauan, mibi unēsān yuecquimbo ictaneshun min tsyuecquid abentsēc tantiaquidtedi bēdambo icmendambi. Nidaid utsi-utsiec yacno tabadquidon min tsyuecquid abentsēc tantiasho bēdambo icmendambi,” quequin Nuquin Papan chiaid con tsusedpan dada uapampic. ⁹ Abi tantiaquidquo icsho ambi Abadauan bēdamboen isampicpadomboen nēbi aton Mado Esus tantiasho Nuquin Papan nuquitsen bēdamboen isec.

¹⁰ Utsiboen Nuquin Papan cuidtequido nendac. —Moisesēn chiampicpadomboenuidi nasho Nuquin Papan bēdamboen istsiashi —quequidēmbi abitedimbo nainquio icsho Nuquin Papan cuidendac. Aden ēnden Nuquin Papan chiaid dada uapampic. “Ambi chiactedi nainquio icsho Nuquin Papan cuidendac,” quepampic. ¹¹ — Ambembi Moisesēn chiampicpadomboenuidi nasho matses bēdamboen isendambi —¿quecta icpanēdash Nuquin Papa? Padenquio. Ambi chiaid niacquidquidquo icsho bēdamboen istiapimbo icquin Nuquin Papan naden chuiquin dada uamepampic. “ ‘Nuquin Papa ambi chiacpadomboen naquidquo nec,’ quequin abi tantiec tabadquidien Nuquin Papan bēdamboen isec,” quequin dada uamepampic. ¹² ¿Ēmbembi Moisesēn chiactedimbo nanuequidta Nuquin

Papambo tantiec tabadpec? Padenquoio.
 “Moisesën chiactedi naquid Nuquin Papabëd
 tabadendac,” quequin chiampicpaden ambembi
 matsesën natiapimbo iquec. Natiapimbo icsho
 Nuquin Papan bëdamboen istiapimbo iquec.

¹³ Aden Nuquin Papan matses abitedimbo
 bëdamboen istiapimbo icnuc Esuquidistu: —
 Èbided cuidshun ëbi tantiaquido ma con Pan
 cuidenquoio icnu —quiash abided ciudadec
 unëspac caondash cuesten dectanac. Aidquoio
 chuiquin Nuquin Papan con tsusedpa dada
 uamepampic. “Cuesten dectanaid Nuquin Papan
 cuidaidquoio nec,” quequin Nuquin Papan chiaid
 dada uapampic. ¹⁴ Adec matses utsi-utsien
 abi tantiaquido cuidmenquoio icnuec abided
 ciudadec Esus unëspac caondash. Èndenquimbo
 con tsusedpa Abadauan chiec: —Yuecshun
 bëdambo icmendambi —quequin Nuquin Papan
 chuiampicpadomboen abi tantiaquido bëdambo
 icmequin aidobëdi aton Mayan tabadmenuec
 Esus unëspac caondash.

*Abadauamba chuishun Moisesetsen Nuquin Pa-
 pan chiaid*

¹⁵ Tantia, con utsibo. Mibitedi chuinu. Min
 matsesën nadoquid. —Naden naindambi —
 quequin dada uashun: —“Abimbo chiaidquoio
 nec,” ma isquidon canu —qeshun abi
 cuëmëdquidtsen dada uaquid. Aid dada uaid dada
 uaquidbëdtambi utsintsen utsi uatiapimbo icquid:
 —Chuiquidën cuidnushe —qeshun. Adembidi
 ambi chiaid utsi uatiapimbo icquid icquin

16 Nuquin Papan: —Nadomboen naindambi — quequin Abadauan chuipampic. —Mibi nibēdanan yuecquimbo ictaneshun min tsyuecquid abentsēcshun matses bēdambo icmendac — quepampic. —Min tsyuecquid abentsēc tantiaquidtedi bēdamboen isendambi —quequin tantiec adpampic. Esus caiqui: —Min tsyuecquid abentsēc —quec adpampic. —Min matses tsyuecquido dadpen —quenquio icpampic. ¹⁷ ¿Ada tantie? Ēndenquimboshē Nuquin Papan Abadauan chuiquin: —Min tsyuecquidēn matses bēdambo icmendac —capampic. Adshumbic yuecquio ictaneshun seta dadpenquio 430ted matameshun Moises utsitsen chuiquin Nuquin Papan dada uamepampic. Ambi Abadauan chiampid niaquenquio icquin Nuquin Papan ambi chiaid utsi Moises dada uamepampic. Muenquio icquin Abadauan chuipampic. ¹⁸ ¿—Ēmbi chiaid ěmbi Moises dada uamiacpadomboen nashouidi mibi bēdamboen isembi —qeshunda Nuquin Papan Abadauan bēdamboen isbempampic? Padenquio. Moises tishabi icnuc ambi chiac: —Nuquin Papan abimbo caic —abi casho Nuquin Papan Abadauan bēdamboen isbempampic. Adashic: —Yuecshun min tsyuecquidēn matses bēdambo icmendac —quepampic. Aden ambi ěndenquimboshē chiampicpadomboen nēbi matses bēdambo icmequin Ēsus tantiaquido Nuquin Papan bēdamboen isec.

¹⁹ ¿Atotsieshun Nuquin Papan ambi chiaid Moises dada uamepampic? —Ēmbi chiaid isash: “Icsamboequien nuquí tabadchitec,” quequin

ma matsesën tantianu –queshun Moises dada uamepampic. Nuquin Papan Abadauan chiampid Esuquidistu choabi icnuc adopampic. Nuquin Papan abi yacnoshon uaido mayan bēdabon Moises chuiuampampic. Adoac Moisesën aton matses Nuquin Papan chiaid chuibampampic. ²⁰ Nuquin Papanquo Abadauan chuipampic. Abadauan caic: –Chuitan –cainquo icquin Nuquin Papanquo Abadauan chuipampic.

Matses abi icsaid tantiamete chiaid

²¹ Aden Nuquin Papan Abadauamba chuishumbic Moisesetsen chuipampic. ¿Ambi: –Min tsyuecquid tantiaquido bēdamboen isendambi –quequin Abadauan chiampid niacquinda Nuquin Papan Moises chuipampic? Padenquo. ¿Matses bēdamboen isnuenda Nuquin Papan ambi: –Naden nata –quequin chiaid Moises dada uamepampic? Padenquo. –Matses bēdamboen isnu –queshun ambi chiaid Moises dada uameshun ambi chiaid niaquesa bēdamboen isun unēsacsho abēdi tabadmetsiash. –Ēmbi chiaid niaquesa nibēdendac –quequin tantiaquin ambi: –Naden nata –quequin chiaid Moises dada uamepampic. ²² –Ēmbi chiaid isun: “Nuquin Papan chiaid matses abitedishunquien niac-niacchitec. Mētaniac abembi mēnchiquidtiapimbo yacbimboec abembi bēdambo ictiapimboen icchitec,” quequin ma matsesën tantianu –queshun Nuquin Papan Moises dada uamepampic. Adec matses abitedi icsamboec tabadsho bēdamboen istiapimbo icquimbi ambi Abadauan chiampicpadomboen

naquin Esuquidistu tantiaquidoudtsëqui Nuquin Papan bëdamboen isec.

²³ Esus choabi icnuc nadquio matses icpanëdash. Moisesën chiacpadomboenuidi natiadquidi abembi bëdamboec tabadtiapimbo icpanëdash. Mëtaniac mënchiquidtiapimbo yacbimboec aidën chiacpadec bëdamboec tabadtiapimbo icpanëdash. Nuquin Papan Esus tantiamiabi icnuc adquio matses icpanëdash. ²⁴ Aden: —Ambi chiaid niaquec icsamboec tabadsho Nuquin Papan ëbi bëdamboen istiapimbo iquec. ¿Nuquin Papa bëdamboen ismequidta nibëdpeba? —nuqui camenuen ambi chiaid Moises dada uamepampic. Aden nuqui icsaid tantiameshun Esustsen tantiamiac: —Esus tantiasho Nuquin Papan nuqui bëdamboen isec icsaisabimboecnuc —nuqui quendac. ²⁵ Aden tantiec: —Isadaidbo tsusedpan chiatedi nashouidi Nuquin Papan matses bëdamboen istsiash —quenquio nuqui iquec. —Esus tantiasho Nuquin Papan nuqui bëdamboen isquin bëdamboen tabadmec —quequin nuqui tantiec.

Nuquin Papan con mado con champi caido

²⁶ Aden Esus tantiasho Nuquin Papan: —Con mado mibi nec. Con champi mibi nec —nuqui capec. ²⁷ Adec: —Esus tantiaquid nebi —quesho acten mentoaid yec Esuspadquio ictiadquio nuqui iquec. ²⁸ Aden Esus tantiasho Nuquin Papan nuqui bëdamboen isec. Isadaidbo yec isadaidpembo yec matses yuaido yec matses yuapenquio yec dada yec chido yec quequin Esus tantiasho nuqui bëdamboen isec. —Matses utsibo bëdamboen

istiapimbo iquebi —quenquo icquin matses ut-sibombi aton Mado Esus tantiasho Nuquin Papan bēdamboen isec. ²⁹ Adembidi abi tantiasho ambi Abadauan bēdamboen isampicpadomboen Esus tantiasho Nuquin Papan nuqui bēdamboen isquin bēdambo icmec ambi Abadauan chiampicpadomboen. Adec Abadauanēn tsyuecquidobimboecquido nuqui nec.

4

Yuabimboecquid isadaidbo yaid

¹ Tanta, con matses. Mibitsen chuinu. Aton na dadpen dayun uaquidēn nuquin matsesēn nadoquid. —Ēbi unēsan con madon con na abitedi bedendac. Bacuē icquimbi con madon con na abitedi bedtiapimbo iquec. Canishumbien con madon con na bedendac —quequin tantiaquidēn amēn aton mado aden chuiquid. Aton papa unēsan caniabi yec utsibon yuabimboec aton mado iquec. ² Caniabi icquin utsibon chiapadomboen naindac aton madon. Adashic aton papan chiapadec canishun aton papan na bedash yuabimboecboedi adquidpenquo yanendac. ³ Adquo yuabimboecquido con matses isadaidbo icpanēdash. Tsusedpabon yuabimboecquido icquin Nuquin Papan bēdamboen iste bēdamboen tantienquo icpanēdash. —Tsusedpabon chiapadomboen Nuquin Papan: “Naden nata,” quequin chiaiduidi nanu —quiashi abembi bēdamboec tabadtiapimbo icpanēdash. ⁴ Adnubien ambi ēndenquimbo tantiampicpadēn Nuquin Papan Esus chomepanēdash. Isadaidbon

chidon tishaid icquin Nuquin Papan: —
Naden nata —quequin chiaid naquidquio Esus
nepanēdash. ⁵ Adec Nuquin Papan chiaid
niaquesambo Esus icnubien ambi chiaid niacash
matses abitedi Nuquin Papan cuidtequido
nepanēdash. Adsho isash matses cuidmenquio
icnuec abided ciudadec Esus unēsac caondash.
Nēbi Esus tantiasho: —Con mado mibi nec. Con
champi mibi nec —quequin Nuquin Papan nuqui
bēdamboen isec.

⁶ Adec: —Con bacuēbo nec —queshun Nuquin
Papan nuquibēdi Esusēn Mayan tabadmec. Adoac
bacuēn amē: —Ēbi, papa —cacbimboen Nuquin
Papa nuqui chianec. ⁷ Esus tantiabi Moisesēn
dada uapampiduidi namenuequido yuabimboec-
quido icboedi nēbi Esus tantiasho Nuquin Papan:
—Con bacuēbo nec —nuqui capec. Aden nuqui
bēdambo icmec ambi Abadauan chiampicpadom-
boembi.

¿Utsin yuameteda bumpe? quiaid

⁸ Tantia. Nēbi matses utsibo mibi chuioanu.
Ēnden Nuquin Papambo tantiesa icquin matses
uaquidpenquiobi utsi mimbi tantiapanēdac.
Papa quequin mimbi tantianēdaidēn yuabo
yec mētaniacimboecquido mibi icpanēdac.
⁹ Nēbi Nuquin Papa mimbi tantiabenondac.
¿Mimbembida adonda? Padenquio. Aidēmbi mibi
tantiamepanēdash. Aidēn tantiamiaidombo
icquin ¿atotsiequin aid tantienquio yanoai?
¿Moisesēn dada uapampiduidi namenuequido
tanshoda Nuquin Papan mibi bēdamboen ispec?
Padenquio. Adquid mētaniacimboecquid nec.
¿Mētaniacimboecquid icoatiadquioda ique?

10 Aden Nuquin Papa tantienquo icquin mimbi icsamboen chiec. —Aid badiadën adenda. Aid inchëshën ushën adenda. Aid setambi adenuidtsëqui nanuna. Nuquin Papan cuidnushe —quequin mimbi icsamboen chiec. Mimbi chiacpadomboen naquid Nuquin Papan bëdamboen iste danquin mimbi icsamboen chiec. ¹¹ Mibi caic: —Adosh —quesho tantiash shubitiadquo iquebi. —¿Ëmbi chiondaidonda Esus tantienquo yampash? —quequin tantiac mibi unësquo iquec.

¹² Con utsibobimboecquido mibi neque. Tantia. Mibitedi chuinu. Isadaidpembo yec mibi: —Moisesën chiampiduidi nanu —quenquo yacimboec yanondabi. —Ëmbi Moisesën chiampid naquin Nuquin Papa bëdamboen ismembi —quenededi ënëdondabi. Nëbi Esusuidi tantiaquid nebi. Adembidi Esusuidi tantiata.

Ëbi adsho tantiash chieshenda. Tauamboen ëmbi Esus chuisho mimbi ëbi chieshënenquo iccondac. ¹³ Mibi yacno tauamboec choshon daicsabudtsëcshumbi mibi Esusën naid chuibanondambi. ¹⁴ Istiapicpambo yec daicsabudacshobi mimbi ëbi cacumenquo iccondac. Ëbi mibi yacno puduedsho isash mibi cuishonquiondac. Nuquin Papan abi yacnoshon uaid mayan bëda choachimboecnuc mibi cuishonquiondac. Nuquin Icho Esuquidistu choachimboecnubidi mibi adondac. ¹⁵ —Min ëshë chicshun ëbi mene —ëmbi cac mimbi ëbi menetsenondac. Aden ëbi mimbi tantiaquiondac. Adondaiddi ¿atotsi quiash chieshcueno? ¹⁶ ¿Nëid abimbo chuiquindambi mibi chieshëmpe?

Padenquo iquemi. ¿Aden chuisho mimbidabi chieshēmpē?

17 Ista. Esus chienquo icquidon ambi chiacpadomboen mibi nametiadquo iqueque. ¿Mibi tantiaquoquin bēdamboen namenuenda mibi chuipec? Padenquo. Ēbi chieshēmenuembien ambi chiacpadomboen mibi nametiadquo icchitec. Mibi abibi tantiamenuen naic. 18 Ēmbien mibi tantiaquin Nuquin Papan chiacpadomboen namenuen yuen chuibanondambi. Aden chuibanac mibi ěmbi chiaidquo tantiabenondac. Ēbēd icquimbi Esus bēdamboen tantiaboedombi ěbi nidtsēcnubi mimbi badedi utsi tantiac. 19 Aden mimbi naid tantiac mibi unēsquo iquec. Anin bacuē tantiabimboen mibi tantiaquiemi. —Esusbimboec icpashun. Aid tantiec ambi chiacpadec bēdamboec tabadpashun —quequin mibi tantiemi. 20 Mibēd icquin bēisquoquin mibi chuitsiambi. Mibēd iquenquo icquimbi mibi bēisquoquin chiabimboen dada uaqin mibi naden chiemi. —¿Atotsieshun Esus tantienquo yanoao? —caimbi.

Abaduanēn mado daēd chiaid

21 ¿—Moisesēn chiacpadomboenuidi naquin Nuquin Papa bēdamboen ismembi —quequido icquina mimbi Moisesēn chiampid bēdamboen tantieque? Tanta. Mibi chuinu. 22 Naden chuiquin Moisesēn dada uapampic. Abaduanēn madombo daēd icpampic. Aton chidon yuaid chido bedshun tishmiaid abentsēc icnuc aton shanunquo aton chidon tishaid

abentsëcbidi icpampic. ²³ Abadauanën chudac badedquo bacuë usundoshon chido yuaidën aton mado tishpampic. Abadauanën chidombo naido icsho: —Mimbi bacuë tishendac — quequin ambi chiacpadomboen Nuquin Papan naidopenquo icmiac aton mado tishpampic. ²⁴⁻²⁵ Aidi Sada nepampic. Chido yuaid Acad nepampic. Aidën tishaid yec aton mado yuabidi nepampic. Icbon chiacpadomboenuidi napampic. Yuaidën madobimboecquido Moisesën dada uapampiduidi namenuequido nec. Adquiobidi Edusaden yacnocquido iquec. Esus tantienquo yec Moisesën chiaiduidi tantiate bunquiec. Nidaid utsi Adabia caid yacno macuësh dapa Sinai caidënsnun Nuquin Papan ambi chiaid Moises dada uamepampic. Aid macuësh matses utsin Acad capec. Aden tantiaquin: — Chido yuaid Acad caidën madobimboecquido Moisesën dada uapampiduidi namenuequido nec —caombi. ²⁶ Edusaden caid utsi iquec. Nuquin Papa tabadacnombo Edusaden caopec. Ambo Esus tantiaquido yec nuquibi tabadendac. Yuaidën madobimboecquido Moisesën dada uapampiduidi namenuequidoen padenquo iquendac. ²⁷ Nuquin Papan ambi chiaid dada uamepampicpade Esus tantiaquido dadpenquo iquendac. Naden dada uamepampic.

“Tantia, chido. Naido icsho mibi chuinu. Bacuë tishtiapimbo yequi bëdambo icta. Bacuë paëmbo icnuc tishacmaid yequi cuishon-queta.

Bënë choquidën bacuë dadpen tishquidën bacuën tsyuecquido daëdpactsëc yanubi

Bacuë nibëdquidën min matses dadpenquioshë yandac,”
 quequin ambi chiaid Nuquin Papan dada uamepampic.

²⁸ Tantia, con utsibo. Mibi chuinu. ¿Ada Nuquin Papan Abadauan chiampid tantie? —Min chido naido iccondaidën tishaid Isac cuëmëdquidën tsyuecquid tantiaquido bëdamboen isendambi —quequin Nuquin Papan Abadauan chuipampic. Abadauan chiacpadomboen aton Mado Esus tantiasho Nuquin Papan: —Con mado nec. Con champi nec —nuqui caindac. ²⁹ Ënden Nuquin Papan naidopenquio icmiampidën mado chieshënquin chido yuaidën madon aton utsibi chieshëmpampic. Adembidi Nuquin Papan Mayanën tantiamiaido Esus tantiaquido Moisesën dada uapampiduidi namenuquidon chieshënendac. ³⁰ Aden Abadauanën mado bëyucquidën aton utsi chieshënsho isun ¿atotsi Nuquin Papan Abadauan chuipampic? “Tantia, Abadauan. Mibi chuinu. Min chidon yuaid aton madobëdtabi cueme. Min mado utsi Sadan madon tsyuecquido dadpenquio caidmequin bëdamboen tabadmembibi. Yuaidën madoembibi padenquio iguendac,” quequin Nuquin Papan Abadauan chiaid dada uapampic Moisesën. ³¹ Sada caidën mado Isac caidpadquid yuapenquio nuqui nec. Esus tantiasho Nuquin Papan: —Con mado mibi nec. Con champi mibi nec —nuqui caic. —Esusënuidtsëqui Nuquin Papa ëbi bëdamboen ismec —quequin Esusquio tantiaquid yec: —Ëmbembibi Moisesën chiacctedi naquin Nuquin Papa bëdamboen ismembibi —quenquio icnuna.

5

Esus tantiasho Nuquin Papan bēdamboen iste chi-aid

¹ Aden: —Esusēnuidtsēqui Nuquin Papa ēbi bēdamboen ismec —matses camenuec abided cuidadec Esus unēspac caondashe. Aidquio tantiata. Muaquidēn: —Moisesēn chiampicpaden nasho Nuquin Papan nuqui bēdamboen istsiashe. Aidēn chiacpaden nanuna —quequin chuisho tantienda. Aden muaquin chiacpaden naic isadaidbo tsusedpan yuabimboec mibi yantsiaque.

² Mimbi isonaid Pabado nebique. Tantia. Mibitedi chuinu. Moisesēn chiactedi naquid Nuquin Papan bēdamboen iste danquin Esus tantienquio yanec muaquidēn chiacpadec shui dēbid dēteshuniadacsho isun Esusēn Nuquin Papa mibi bēdamboen ismetiapimbo ictsiashe. Adenda. ³ Aden Moisesēn chiaid abentsēc natsēcshun aidēn chiaid utsitedi nainquio icsho Nuquin Papan mibi bēdamboen istiapimbo ictsiashe. Moisesēn dada uapampiduidi namenuequido tanenda. ⁴ Aido Esus tantiesabo nec. Aden abi bēdamboec ismianquid Esus tantienquio icsho Nuquin Papan aido bēdamboen istiapimbo iquec. ⁵ Esus tantiaquidoen Nuquin Papan Mayanēn tantiamiacpaden naden tantiec. —Esus tantiashouidi ambi chiaid niac-niacacmaidbimboecnuc bēdamboen isquin Nuquin Papan: “Mibi bēdambo iquec,” nuqui caindac —quequin nuqui tantiec. ⁶ Shui dēbid dēteshunaidēn Esus tantiasho Nuquin Papan bēdamboen isec. Adembidi shui dēbid

dētiacmaidontsen Esus tantiasho Nuquin Papan bēdamboen isoaic. Aden Esus tantiabenash: — Ambī chiacpadomboen Nuquin Papan matses tantiaquid ēbi icmendac —quequin aden utsibo tantiasho isun Nuquin Papan: —Adquid con Mado tantiaquid nec —caindac.

⁷ —Bednu —quequin nadancacimboen aiduidtsēqui tantiaquin mimbi Esusquo tantiondac. ¿Tsuntsin muaquin chiac Esus tantienquo mimbi yanoape? ¿Atotsiequin abimbo chiaid niacpe? ⁸ ¿Nuquin Papan nacta Esus tantienquo yano? Padenquo. Ma aidēmbi mibi Esus tantiametiadquo yoc. ⁹ Muaquido tantienda. Nadquo aid iquec. Tosho bedquid abentsēcshun bedmebanac abitedi toshoquecuededec. Adembidi muaquid abentsēcshun chiac matses dadpeshun abimbo tantienquo yantsiashe. Muaid tantienda.

¹⁰ —Nuquin Icho Esusēn tantiamiac ēmbi chiacpadomboen Cadasia yacnocquidon tantiatsiash —quequin mibi chiec nebi. Mibi muaquin chuiquid Nuquin Papan cuidendac.

¹¹ —“Con tsusedpan chiacpaden shui dēbid dēteshuniaiduidtsēqui Nuquin Papan bēdamboen istsiash,” queposh Pabado —quequin ¿tsundanquieni muauapac caosh? ¿Adendambi chuidio? Aden ēmbi chuisho adembidi chuiquidon chieshēnenquo ictsenoshi. Esus chienquo icshe ēbi chieshēnenquo ictsenoshi. Abi tantiaquid cuidmenquo icnuec abided cuidadec unēsaid Esusuidi chuisho mabi chieshēmpaboc. ¹² Mibi muaquin chuiquido Moisesēn dada uapampiduidi namenuequido caic: —Auēshquo

cuemepashun –caimbi.

Esus tantiaquido bēdamboec tabadte chiaid

¹³ –Ēbi cuidmenquoio icnuec abided cuidadec unēsaid Esusquoio tantiasho Nuquin Papan ěbi bēdamboen isec –camenuen Nuquin Papan mibi Esus tantiamiac. Adoac: –Esus tantiasho Nuquin Papan cuidtiapimbo iquebique. Ēbi icsate bunaid nanu –quenda. Nēbi Esus tantiaquin mibi icsate bunaid ěnquin mēmunta. Esus tantiaquido yec tantiananquiec nashunanta.

¹⁴ Adomboen Nuquin Papan Moises naden chuimiapadomboen mimbi natsiac. “Mibibi min dada datantiadacimboen utsibotsen bēdamboen tantiaquiota,” quequin Nuquin Papan ambi chiaid Moises dada uamepampic. ¹⁵ – Opa penantiadpambo yacimboec nēishnanash chushcananosh –quiosh mibi caic. Aden naic mibi icsacuededeque. Esus tantienquoio mimbi yaneque. Bēdamboec tabadta.

Nuquin Papan Mayanēn bēdamboen tabadmete

¹⁶ Nuquin Papan Mayanēn tantiamiacpadomboen naic bēdamboec tabadta. Aden mibi icsate bunaid mimbi nainquoio ictsiac. ¹⁷ Nuqui

icsate bunaid naiqui Nuquin Papan Mayanēn tantiamiacpadec bēdamboec tabadtiapimbo nuqui ictsiac. Nuquin Papan Mayanēn tantiamiacpadomboen tantiaquin nuqui icsate bunaid ěnquin nuqui mēmuntsiac. ¹⁸ Nuquin Papan Mayanēn tantiamiacpadomboen tantiec: – Esusēnuidtsēqui Nuquin Papa ěbi bēdamboen ismec –qeshun: –Moisesēn chiactedimbo naquin

ëmbimbo Nuquin Papa bëdamboen ismembi —
quequin tantienquo nuqui iquec.

¹⁹ Nadquo icsateuidi bunquid matses
iqueque. Tantia. Chuinu. Nëidic aton
chidopenquo chudquido. Nëidic aton
bënëpenquo chudmequido. Nëidic dada daëd
chichudnanquido. Nëidic opabimboec chudnante
bunquin matses ismequin adoquido. Nëidic
tsienbëdta shui chuibudquin icsamete bunquido.

²⁰ Nëidic Nuquin Papan chiaid niac-niacquin
ambi matsesbimboecnuc nacnenaïdi papa
caquido. Nëidic nënëchoquido. Nëidic dauë icsa
bedash icsa uanquido. Nëidic chieshëmënquido.
Nëidic chieshëmënec chushcananquido. Nëidic
cudasquido. Nëidic nëishëmënquido. Nëidic
ambi naiduidi naquido. Nëidic abitedi cuësh-
cuëshëdmianquido. Nëidic: —Utsin chiaid
tantiatiapimbo iquebi. Ëmbentsëqui bëdamboen
chiembi —quequido. ²¹ Nëidic utsin na natiambo
bunec chieshëmënquido. Nëidic tantiadenuen
paëmbo icquid acquido. Inchëshën ushenquo
icquin adoquido. Adquidtedishun icsamboen
naic. Adec abi icsaid ëntiapimbo yec unësash
Nuquin Papa yacno tabadtiaipimbo iquec. Aden
mibi chuibanondambi ënden.

²² Padnuen Nuquin Papan Mayanën
namiaid yec nadquiec tabadquid. Nuquin
Papabëdta matses tantiaquiec tabadquid. Esus
tantiec cuishonquec tabadquid. —Nuquin
Papan ëbi bëdamboen isec —quec bëdambo
yec dacuëdenquo yec tabadquid. Utsibon
chieshënaqui chieshëmënenquo yec tabadquid.
Nëishëmënenquo yec tabadquid. Bëdamboen

isquin utsibo nashunec tabadquid. Muainquoio yec tabadquid Nuquin Papan namiaid. ²³ — Con nauidi naimbi. Èbiuidtsëqui bëdambo iquec —quenquoio icquin utsibo bëdamboen tantiec tabadquid. Abi icsate bunaid ënquin mëmunec tabadquid. Adquoio yec Nuquin Papan Mayanën namiaido Esus tantiaquido bëdamboec tabadtsiash. ¿Adec bëdamboec tabadsho isunda: —Adec tabadenda —quequin Nuquin Papan Moises dada uamepampic? Padenquoio. — Icsamboec tabadenda —quequin icsamboec tabadquid chuiampic. Nuquin Papan Mayanën tantiamiacpadec tabadquin aden chuiampid nuqui niaquenquoio iquec. ²⁴ Adoenquoio icquin cuesten dectanac abided cuidadec unësaid Èsus tantiaquin nuqui icsate bunaid ënquin nuqui mëmuntsiac. ²⁵ Aden icsamboen nainquoio yec bëdambo icnuna. Nuquin Papan Mayanën Esus tantiamiaid icquin aidën tantiamiacpadomboen nanuna.

²⁶ —Èbiuidtsëqui bëdambo iquec —quenda. Adenquoio yec nuqui chuiquid dëniacte bunenquoio yec bëdamboec tabadnuna. —Èbi bunacpaden ëbi namianenquien icchitec. Utsien namechitec — quec chieshëmë nec tabadenda. Nëishnanenquoio yec bëdamboec tabadnuna.

6

Esus tantiaquido bëdamboec isnante chiaid

¹ ¿Nuquin Papan Mayanën tantiamiacpadomboen bëdamboen tantiaquidta icpec? Adquidën abëdtan Esus tantiaquidën icsamboen nasho isun: —Padi. Esus tantiaquid adesambo neque.

Bëdamboec tabadta –caquid yendac. –Nëishec ëbitsen icsamane –queshun nëishenquo icquin aden chuiquid yendac. Abibi datantiadec: – Icsaquid nebi. Esus bëdamboen tantienquo yec adecbidi icsatsiabi –quequin tantiec: – Bëdamboec tabadta –quequid yendac. ² Adec bëdamboec isnanec: –Bëdamboec tabadnuna – quec chuinanquiota. Adecbidi nashunanquiota. Aden naquin Nuquin Icho Esuquidistun chiacpadomboen mimbi natsiac.

³ Utsien: –Utsibëd onquetiapimbo iquebi. Ëbiuidtsëqui bëdambo iquebi –quec abibi muauadquid icsambo iquec. ⁴ Adenquo yec mibibi datantiadta. –¿Nuquin Papan chiacpadectabi bëdamboec tabadpe? –quec mibibi datantiadta. Adashic: –Ai, Nuquin Papan chiacpadec tabadebi –quiash adecbidi bëdambo icta. –Utsitedi icsambo icnubi ëbiuidtsëqui bëdambo iquebi –quenda. ⁵ ¿Mimbi utsibon naid chuibanshoda Nuquin Papan: –Mibi bëdambo iquec –capatsiash? Padenquo. Mimbi bëdamboen naid isun: –Mibi bëdambo iquec –catsiash.

⁶ Esus tantiaquidon nadoquid yendac. Nuquin Papan chiaid abi chuibanquid nashunquid yendac. ⁷ Piacbo sequidbimboec matses iquec. Tantienquo icquidën icbompin uestsaidi siac canienquo ictsiash. Padnuen tantiaquidën ëshë bëdaidquo siac bëdamboec canitsiash. Tantienquo icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unësash Nuquin Papa yacno nidtiapimbo iquec. Padnuen Ësus tantiaquid ambi chiacpadomboen naic unësash

Nuquin Papa yacno nidendac. Ĕbi adsho tantiash: —Icsaido Nuquin Papan cuidenquo icsiash — quec muaic tabadenda. Ambi chiacpadomboen mibi cuidendac. ⁸ Ambi chiaid niac-niaquec abi icsate bunaiduidi naquid cuidendac. Nuquin Papan Mayanĕn tantiamiacpadomboen naquidien bĕdamboec tabadec unĕsash Nuquin Papa yacno tabadendac. ⁹ Ĕmbi aden chuisho tantiash bĕdamboec tabadta. Bĕdamboec tabadec chieshtoenquo icsho isun ambi tantiacpadĕn Nuquin Papan abĕdi nuqui tabadmendac. ¹⁰ Adec bĕdamboec tabadquin utsibo bĕdamboen isquin nashununa. Aden utsibo bĕdiactsĕc tantiec Esus tantiaquido yec tantiananquiec nashunanquionona. —Shubu abentsĕquĕn tabadquidobimboec Esus tantiaquido iquec — qeshun adonona.

Pabadon ĕnquimbi chiaid

¹¹ Is. Nua-nua icnuc dada uaquin ĕmbimbo ĕnquimbi dada uanu. ¹² Muaquin chiquidon mibi con tsusedpan chiacpadomboenuidi nametiadquo iqueque. Aidon chuisho tantienda. Con matses isadaidbo: —Mibi bĕdambo iquec —camenuen mibi adometriadquo iqueque. — Esusuidi chuisho con matsesĕn chieshĕnquin cuidnushe. Moisesĕn chiacpadomboen namenu —quequin mibi shui dĕbid dĕteshunemetiadquo icchitec. Aido muasho tantienda. ¹³ Aden mibi: —Adota —caquidombi Moisesĕn chiatedi nainquien icchitec. Adquid yec: —Is. Bĕdambo iquebique. Ĕmbi chiacpadomboen nĕidon naosh — quenuembien mibi shui dĕbid dĕteshunemetiadquo

icchitec. Aidon chiacpadomboen nainda. ¹⁴ Ēbien adtiapimbo iquec. Esus tantiesabimboec: — Ēbibi bēdambo iquebi —quetiapimbo iquebi. Esusuidtsēqui bēdambo iquec. Abi tantiaquid cuidmenquo icnuec abided cuidadec unēspac caondash cuesten dectanac. —Aidquo tantiec bēdambo iquebi —caimbi. Aden Esus tantiec: —Ēmbimbo Moisesēn chiacdedi naquin Nuquin Papa bēdamboen ismembi —quec ēnēdondabi. Adecbidi Esus tantiec ēbi bunaid ēnash icsate bunenquo iquebi. ¹⁵ —Moisesēn chiacdedi naquiduidi Nuquin Papan bēdamboen istsiash —quetiapimbo iquebi. Shui dēbid dēteshuniadēmbi Esus tantienquo icsho Nuquin Papan cuidtsiash. Adembidi shui dēbid dētiacmaidēn Esus tantienquo icshobidi cuidtsiash. Nuquin Papan Mayanēn chuca uaidien Esus tantiaquid Nuquin Papan bēdamboen isquin bēdamboen tabadmec. ¹⁶ Ēmbi aden chuisho tantiaash: —Ai, abimbo mimbi caique. Adonona —quesho: —Aido Nuquin Papan bēdamboen isquin bēdambo icmepashun —caimbi. Adquido Nuquin Papan: —Con matesquo nec —caindac.

¹⁷ —Abimbo chienquien icchitec —ēbi cainda. Esusēn chiaidquo chiombi. Aidquo tantiaquin ambi chiacpadomboen nabanta. Ēmbi Esusēn chiacpadomboen nasho isun chieshēnquin cuesaniondashi. Cuesonaid bish abi iquec. ¹⁸ Tanta, con utsibo. Mibi Nuquin Papa chianembi naden. —Mimbi nabocpadomboen con Icbo Esuquidistubēdtan Cadasia yacnocquido bēdamboen ista, Papa —quequin Nuquin Papa chianembi. Padi. Aidedi chuiquin dada uaombi.

Esuquidistu Chuiquin Tantiamete New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

446da786-5bd1-5ffa-85e2-9eff4052cf8b